



UKA 2015/019  
30. september 2015  
Kalistat Lund

**Pilersaarusionerq aamma nunaminertat atorneqarnerat pillugit inatsisip (Nuna tamakkerlugu pilersaarussiaq, nunaminertanik inniminniineq, akuersissutip sivilissusaasa sivitsorneqarnissaanut periarfissaq, utaqqisunik saqqummiussineq, pilersaarutitut aamma nunaminertanut naammagittaalliuuteqartarfiup peersinnera il.il.) allanngortinneqarneranik inatsisip nr.xx, xx.xx.201x atuutilersinnissaanut Inatsisartut aalajangiiffigisassaannut saqqummiussissut**  
(Aningaasaqarnermut Aatitassanullu Naalakkersuisoq)

Nunaminertamik atuisinnaanermut tunngassutillit, aalajangiiffigisassatut siunnersuummi nalimmassaaviginarneqarnerat Inuit Ataqatigiinnit ima isummerfigaarput.

Ukiuni aggersuni qinnuteqaatsinik samminnittarnissat annikilliarternaviangitsut nalunangilaq, nunamik atuilluni aningaasarsiorfiusussanik suliffissanillu pilersitsiortortoqarnissaa tamatsinnit kissaatigineqarmat nunattalu pinngitsoorani aamma pisariaqartimmagu.

Nalimmassaannerit eqaallisaaviusariaqarput sullitanut pisortallu sullissinerannut pitsaannerusumik kinguneqartussamik aaqqiiviusumik. Marloqiusamik aallaavilimmik pisortanit sullissisoqartarnera, sullissinermut eqaqutaasaqisoq, periutsinik allannguinerit nalimmassaanerillu aqquutigalugit qimakkiartuaarneqassasoq isumaqatigaarput.

Siunissami nunaminertanik atugassiisarnissani inniminniisarnissanilu qularnaaqqaneqartariaqarpoq inuussutissarsiutit inuiaqatigiinnut pingaarutillit innarlerneqannginnissaat ineriartoqqissinnaannerisalu akornuserneqannginnissaat. Nunaminertami inuussutissarsiorfissatut atuinissaminut akuersissutaateqartoq qulaatiinnarlugu allanut akuersisarnertit pisinaasariaqanngillat. Tamanna nunatta kujataani savaateqarfimmi misilittagaqarnerliorfineqartoq pisinnaasariaqanngitsutut isumaqarfigigatsigu.

“Nuna tamakkerlugu pilersaarusiap” ukiut tamakkiangikkaluarlugit saqqummersinneqartarsinnaanneranik periarfissaalersitsiniarneq isumaqatigaarput. Pisariaqartitsinermik aallaavilimmik akuttussuseqarluni saqqummertaruni naleqqunnerummat.

Nunaminertanik inniminniineq, akuersissutip sivilissusaasa sivitsorneqarnissaanut periarfissaq, utaqqisunik saqqummiussineq, pilersaarutitut aamma nunaminertanut naammagittaalliuuteqartarfiup peerneranik, sullissilluarsinnaannerunissamik siunertaqarluni allannguniarnertut isigalugit akuersaarparput.

Kissaatigaarput siunnersuut aappassaaneersumik oqallisigineqartinnagu ataatsimiitsitaliami susassaqartumi nalilersorneqaqqaassasoq.